

庚五

嶺南雜記

庚五

嶺南雜記

龍威秘書七集

吳氏說鈴攬勝

第五冊

嶺南雜記

吳震方



嶺南雜記

石門吳震方青壇著

由南安二十五里至庾嶺路甚平可容雙車有雁回人遠碑爲南雄府界從此入粵碑爲山東八歲兒宋世勲行書廣東藩司宋某之子山路爲大宗伯楊諱正中使粵時重修

庾嶺又名梅嶺以漢庾勝梅鎬得名然庾嶺多梅古昔已然自有折梅逢驛使淚盡北枝花之句而好事者往往增植之自宋迄明往來宦游者多有補

種某推官女亦植三十株鐫詩於石明趙太守題
曰梅花國至今老梅尙繁

松徑張曲江植至今尙存嶺爲曲江開鑿有文獻祠
存焉予有謁祠詩

有唐際全盛始興實挺生崛起嶺海間光嶽儲精
英童穉標峻格許與皆鴻卿燕公尤器重一顧延
華聲弱冠擢高第耻立寵嬖廷復辟始登仕進退
必守經開元被引薦拾遺職其膺千秋金鑑錄萬
古垂箴銘太子誤索甲據典屹廷爭義折惠妃請

陰寢奪嫡情前星無隕耀功繫在宗祊守珪倖軍
功仙客且負乘爵賞將濫及批鱗氣崢嶸對仗草
詔書詞濶義恢宏制誥遂手掌中書因游登宴安
釀醢毒地大孽牙萌祿山跋扈姿履霜識堅冰守
珪骹軍法大猾逃天刑哲相炳幾先庸主方昏冥
遂令范陽甲席捲東西京干戈滿郡國腥穢汚闕
庭九廟寄灰燼六龍亦伶俚郭李亟反正四海久
沸羹竟貽藩鎮禍割據連方城浸假闢弄權天子
爲門生覆轍日相逐國祚由茲傾早得用公言反

掌戮鯢鯨根柢失剪伐滋蔓勢莫撓虞機吝一發
曲突空經營卽當蜀道中涕泣感忠貞曲江雖遣
祭前悔不可懲峻絕大庾嶺開鑿通人行至今橫
浦關廟祀陳椒馨千載想遺烈仰止深肝衡扼腕
當日事感憤涕縱橫

韶州府城上周圍俱葢房舍兵環居之不作女牆謂
之陰城攻之難破康熙乙卯吳逆遣吳國柱馬寶
攻之年餘不能克

丹霞山在韶州府仁化縣有瑰瑋絕特之觀

其最勝有一線天海山門緣鐵索而上始
達海山門登說法臺是山之最高處也寺極奇麗
對面爲獅子巖旁寶珠峰與海螺峰對其後爲龍
尾巖卽山之盡處勢逶迤而下相傳丹霞爲龍形
故名其他四面轉側處處標奇但視一面不足攬

其勝概也

自韶州至英德一路山皆陡峭拔起平地如削中多
洞穴人構木居之大約粵地深山大澤固多而孤
巒隻嶽尤饒奇特

英德觀音巖卽碧落洞層累而上洞口俯江有石乳
如垂蓋旁有小洞號雲華深不可測余有詩

石壁坼一罅遂閣凌千層梯棧構迴幹黑逕然明
燈幽閼悚毛髮循欄得高登俯江浩呼洶站站愁
飛鷹目眩魄欲墮心空境逾清寒風出壑底三月

凝霜稜巖乳滴成蓋洞口垂幢旌影倒日光入江
水搖晶熒或當夜靜時山鬼吟秋屏歷此塵外境
不似寰中行可惜蒼鮮面刻畫遭湮黥何當霹靂
過洗出雙崖青巖側洞口滑一望先驚悸隧道試
從入已覺龍氣腥波濤乍畜洩風行來杳冥竒探
未及恣落照前山頽舟去不得住岐路悲心生擾
擾塵土間俯仰慚山靈

中峽飛來寺梁普通年自舒州飛來遺一殿角于梅
嶺今爲雲封寺頗多題詠寺後石壁羅隱書雲隱

二字余有律詩二首

會聞飛寺勝偶過得登臨曲磴懸丹棧危亭綴碧
岑山稠耕地少樹密瘴雲深暫此偷閒息蒼茫雨
氣侵 雷雨來中峽喧歷百谷排界青千嶂瀑掩
翠一江霾水急催行櫂涼生淨客懷汲泉歸瀹茗
沙軟濕青鞋

佛山鎮離廣州四十里天下商賈皆聚焉烟火萬家
百貨駢集會城百不及一也街道甚窄僅容兩人
交臂而行

粵俗最喜賽神迎會凡遇神誕則舉國若狂余在佛山見迎會者臺閣故事爭奇閭巧富家競出珠玉珍寶裝飾孩童置之綵輿高二丈陸離炫目大紙爆俱以繪綵裝飾四人捩之聲徹遠近中藏小爆數百五色紙隨風飛舞如蝶聞未亂時更盛土人頗慚此會殊寒儉矣

廣州府有新城舊城舊城向爲逆藩尙可喜駐鎮城中皆其子姪及漢軍藩下官員圈住大小衙門俱在新城自蕩平後衙門仍入舊城巡撫衙門爲尙

可喜府第最爲宏敞將軍衙門爲尙之孝府第壯麗尤甚內僭爲九間殿今爲將軍府將軍王永譽分爲三春始敢居之大堂前榮有拜單石深一丈二尺濶六丈門前石獅乃耿逆在粵時從肇慶取石爲之高大雄駿東南希有後移藩閩中故之孝居之藩逆盛時其奢僭病民如此今新城各衙門俱斥賣僅存總督衙門爲入省駐節之地

粵中弊政頗多而夫務漏卮爲尤甚番禺老儒唐化鵬條議云粵向年用兵百姓死于盜賊者十之一

清
新
政
府

二死于徵調者十之五六其害莫慘于取夫蓋名則取夫其實取工匠取器物以及發養牛馬之類無不在取夫之內者取夫舊例五十家出一名則有那移增減之弊有不及五十家而出一名者有不止五十家而出一名者縣官每十名多取一二名其甚者多取三四名夫房則以一而派十保長奉行箕歛又加取一倍二倍不等每月每名需用銀二三十兩甚而有用數十名甚而有用百數十名百姓至賣兒女以雇夫折夫卽此一事官取之

夫房取之保長取之譬如病夫更遭顛撲幾何而不立斃也欲絕其弊莫若通計一省夫額若干每名每月徵銀一錢通廣州之夫不下數萬每月卽有數千之銀取給通省之調遣及各答應自見其有餘不見其不足矣而或者曰百姓向者每夫一名每月出夫銀多至數十或百數十公家尙且不足而每名每月出銀一錢而足者未之信也不知前之夫銀如此之多然公家用之縣官用之夫房保長亦用之其不足也宜矣今每名每月一錢輕

而易舉投之于官明白無弊夫房保長不得而染指則以積而待公用鮮不足矣夫以五十家出夫一名每名每月出銀一錢只一家每月出銀二厘耳且聚于公家有事方按籍而取之無事則留以待賑濟否則全免之公私兩便無有過于此者矣至其徵收之銀則以一府佐之廉明者司之各縣徵解藩司發所司府佐開支每月造冊分繳督撫藩司覈其用否查其存留互相稽察而所司之府佐于每驛鎮馬頭衝繁之處各選夫吏一名凡有